

Fum Haus- un Bauerngoarde

aus der Reihe Sellemols



Jedzd is Summer un es bliiht un wext immerall uff de Ecker un de Gerde. Wenn doch nur die verdammde Knackwerm (Engerlinge) nedd wärn! Die fresse fun de schönste Planze die Wurzele radikal ab. Die Planze gehen ei un de Rasen wext aa net meer un werd gelb.

Ourewäller Bauerngoarde: Blumme un Gemies.

Heit mescht isch awwer drozdem mol en Blick – zurick – in die Gerde von sellemols werfe. Wie woar des mit denne scheene Bauerngerde, von denne es in Traase nur noch e poor gibbt – in Berwisch orrer Frankehouse werns aach heit noch einische meer soi? Un je weider mer in de Ourewold nei kimmt, desdo meer gibbt´s aach heit noch fun denne wunderscheene Haus- odder Bauerngerde.

Aach heit wird eichtlich doch noch e ganze Menge Zeigs geplantz. Jedzd häwwe die Leit Wasserleidunge, frieher a Bumb odder en Bach ganz in de Neeh – do woar dann genung Wasser zum Gieße do. Awwer des Wasserschleppe woar e zimlich schwer Erwend.

Im Friejohr is es mit em Spinat losgegange. Dann sinn gelwe Riewe gesät un Erbes gelegt woarn. Nadierlich mussde aach Zwiwwel gesteckt wern, meeglichst e poor Länner voll, denn Zwiwwel brauch mer immer in de Haushaltung fier alle möchliche Sache. Im Winder is sogar Zwiwweltee gekocht woarn fer de Husde. Wann de Gorde groß genung woar, sinn aach Frikardoffel gelegt woarn. Salat un Kieschekräuder wie Schnittlauch, Pedersilije, Bimbernell un Dill fer die Gummern un Bohnekraud un Sellerie un Laach hawwe aach immer dezu geheert.

Bohne un Gummern sinn erscht nooch de Eiseheilische gelegt woarn – so im halwe Mai. Die Bohne musste ganz flach in de Erd leije, die wolle die Glocke leide heern.

E poor Bisch mit Gehannstraibscher un Stachelbeern orrer Himbeer hawwe aach dezu geheert un späder dann noch e poor Erbel.

Die Gemies- un Salatplanze wern nadierlich selwert gezoche. Erscht wird gesät und dann die kloane Plänzjer verrobbt. Do hatt mer dann Wersching, Rotkraut, Weißkraut, aach griene Salat un Handivdsche. Manche Leit hadde aa roade Riewe, Owwererdkoolrawe un Rosekohl. Uff jeden Fall steckt veel Aweit fer die Hausfraa dehinner; die Mannsleit hawwe do net mitgeholfte, die hawwe anner Aweit.

Es wär jedzd noch veel zu verzähle wie des Goardezeig geerndet woarn un üwver de Winder gebroacht woarn is.

Zu em scheene Bauerngorde hawwe aach veele scheene Blumme geheerd: im Friejhohr gab´s Goldlack, e poor Tulwe und Narzisse, Vergissmeinnicht und Stiefmüdderscher, die aach „Gesichte“ genannt woarn sinn. En Fliederbusch woar immer debei. Wunnerschee woarn die bundische Summerblumme, am Zaun die Wicke un Stockrose – aach Bauernrose genennt – Margaridde un im späde Summer un Herbst dann Astern un präschedische Dahlie. In er annere Eck hadd noch en Busch Schleierkraut gestanne für die scheene Sträuß. Die Butzeblumme un Struwelköpp fer de Sunntagssträuß, um demit es Grab von de liewe Angehörische zu schmücke derf net vergesse wern.

Die Bauersfraa woar mit Reecht stolz uff ihrn Goarde.

In de 50er und 60er Joahrn hawwe die Leit als erschdes zusäje misse, dass se ihrn Lävunsunnerhald zammegebroacht häwwe. Es is so gud wie alles sälwert geplanzt un gewunne woarn. Dodebei hawwe die Bauerngerde e wischdisch Roll gespeld.

Noch einer Zeid, wo die Goardeaweit sou wie gud kaa Werdshätzung erfoarn hadd, gibbt´s seid einischer Zeit was anneres zu beobachde: Veele Leit sinn schaff uff en Schrebergorde odder e Eckersche; sie wolle sich e Stick weit sälwer versorche odder zumindest beim Bauer direkt eikaafe.

Gärdnern vor de Hausdür is also widder in! Alles Gude kimmt zurick! Es läbe die Nadur!

Quelle: Ria Märtin: Ourewäller Kumm-Owend, Odenwald-Verlag u.a.

Bearbeitet, verändert und ergänzt von

Hans-Edgar Bickelhaupt
Arbeitskreis Heimatgeschichte Mühlthal